

八方生氣充溢四體當以四時王相日造所求皆得攘災滅惡病者得差死者更生凡合腎氣署預及諸大五蟲大麝香丸金牙散大酒煎膏等合時勿令婦女小兒產婦喪孝固疾六根不具之人及雞犬六畜等見之凶其續命麻黃大黃等諸小湯不在禁限比來田野下里家因市得藥隨便市上雇人搗合非止衆見諸不如法至於石解等諸難搗之藥費人功力作者悉盜棄之又爲塵埃穢氣皆入藥中羅篩漉惡隨風飄揚衆口嘗之衆鼻嗅之藥之精氣一切都盡與朽木不殊又復服餌不能如法服盡之後反加虛損遂謗醫者處方不効夫如此者非醫之咎宜熟思之凡百藥皆不欲數々曬曝多見風日氣力即薄歇無用宜熟知之諸藥末卽用者候天晴時烈日一日曝之今火干以新瓦瓮貯之泥頭密封須用開取卽急封之勿令中風雖經年亦如新也其丸散以瓷器貯蠟封之勿泄則卅年不壞諸杏人及子等藥凡器貯則鼠不能得之凡貯藥法皆去地四尺則土濕之氣不中之凡藥冶擇熬炮訖然後秤之以依方不得生秤

〔唐六典十四太常寺〕太醫署

凡藥有陰陽配合子母兄弟根葉花實草石骨肉之異及有毒無毒陰乾曝乾採造時月皆分別焉

凡藥八百五十種三百六十神農本經一百八十二名醫別錄一百一十四新修本草新附一百九十四有名無用

皆辨其所出州土每歲貯納擇其良者而進焉

〔萬安方五十五論說〕湯散圓

湯散圓各有所宜古方用湯最多用圓散者殊少煎散古方無用者唯近世人爲之大體欲達五臟四肢者莫如湯欲留膈胃中者莫如散久向後散者莫如圓又無毒者宜湯小毒者宜散大毒者須用圓又欲速用湯稍緩用散甚緩者用圓此大槩也近世用湯者全少應湯者全用煮散大率湯劑氣勢完壯力與圓散倍蓰煮散多者一啜不過三五錢極矣此功效力豈敵湯勢然既力大不宜有失消息用之要在良